

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

11 Mai 2018  
(24 Shabaan 1439 AH)

**Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « L'Islam et Ramadhan ».**

*Alhamdulillah Rabbil Aalameen*, tous louanges pour Allah Ta'ala, Maître de bane les Ciels et de la terre. Encore ene fois par la grâce d'Allah nous pé accueillir le mois béni de *Ramadhan* et *Insha-Allah Ramadhan* pé commencer vers le 16 ou 17 Mai 2018.

Ô bane croyants, *Ramadhan* li ene mois sacré kot Allah (swt) pé constamment tester So création et donne l'humanité l'occasion pour atteindre la joie infini. *Roza* li ene purification complète et ene moyen pour développe conscience de la présence d'Allah, reconnaissance de la présence Allah, et trouve So manifestation partout. Et *Roza* faire ene *Rozédaar* gagne plisse *Taqwa* et *Taqwa*, li ene protection contre tous bane plans Shaytaan et souffrance dans sa le monde là.

Allah (swt) informe nous: **Et celui ki peur Allah, alors Li (Allah) pour tire ene chemin de délivrance pour li. Et Li (Allah) pour approvisionne li depuis kot li pas penser. Et celui ki mette so confiance lors Allah, eh bien Li suffit pour li. Sans doute, Allah pou accompli So but et Allah fine garde ene mesure pour sak kitchose.** (At-Talaq 65: 3-4).

Beaucoup musulmans azordi jours ena ene mauvaise conception à propos *Roza* et activités ene *Rozédaar*. Zot alle dans ene l'état de semi-hibernation, et passe la majeure partie de zot létemps dormi. Si vraiment zot pé garde *Roza* pour Allah et zot ena ene crainte pour zot Créateur, zot lever, lire le Quran Shariff et l'heure Namaz faire zot Namaz et Zikr aussi. Mais ena lever l'heure Namaz, et après zot ré-alle dormi couma fini faire Namaz. Sa dormi là faire zot vine paresse. Et zot activités spirituel ki zot ti bizin faire, kot zot ti bizin profite beaucoup le mois béni, zot perdi sa bénédiction divine là.

*Ramadhan* li ene moment d'activités intense pour ene croyant kot li léger de sa poids de manger et boire là; donc kot li capave faire plisse zéffore dans le chemin Allah (swt), donne plisse létemps dans faire le Zikr, Namaz Nafil, lire beaucoup le Quran Shareef, contrôle so *Nafs*, vine ene dimoune pli sage, pli humble, éloigner avec toute sortes kalité péchés, couma vey zaffaire dimounes, faire palabres etc. Au contraire zot bizin éloigner avec tous bane disputes (bane discussions inutiles, la guerre, la haine et la jalousie, bane doutes). Ou bizin concentrer ou-même plisse dans faire bane bonne actions et faire *Istigfaar* (demande pardon avec Allah) pour tout ou bane péchés pour ki ou Créateur pardonne ou bane péchés et accepter ou *Roza* et ou bane *Ibaadat*.

Si ou conne l'histoire de l'Islam et de *Ramadhan* dans l'histoire kot nous bien-aimé prophète Hazrat Muhammad (saws) fine passe à peu près neuf *Ramadhan* après *Hijrat* kot sak *Ramadhan* ti rempli avec bane décisions bien important et montrer nous ene l'exemple sacrifice et soumission envers Allah (swt). Dans premier l'année *Hijra*, le prophète (saws) ti envoye Hamza ibn Abdul Muttalib (ra) avec trente cavaliers musulmans vers Saif al Bahr pour intercepter 300 cavaliers depuis Quraish ki ti là-bas. Bane musulmans ti pour la guerre mais sa bataille là fine empêcher par Majdi ibn 'Amr Al-Juhani ki ti ene dimoune ki ti d'accord avec tous les deux parties, bane musulmans et bane non-musulmans de parmi bane Quraish, et de ce fait li fine agir comme ene médiateur entre les deux pour empêche zot la guerre. Quant à bane hypocrites de Madina, zot ti construire zot propre masjeed (*Al-Dirar*) pour casse l'unité de bane musulmans. Rassoollullah (saws) ti ordonne so bane compagnons pour détruire sa masjeed là dans *Ramadhan*.

Le 17 Ramadhan 3 AH, Allah Ta'ala ti sépare la vérité du mensonge dans grand bataille de Badr. Sa la guerre là ti faire contre ene l'armée bien équipé de bane Quraish, ki ti ena comme l'objectif, l'extermination de l'Islam. Ti ena zis 313

musulmans. Mais malgré sa différence ki ti ena dans nombres là, et aussi malgré le manque d'équipement et faiblesses de l'armée de l'Islam, Rassoollullah (saws) fine sorti victorieux parski bane musulmans ti armé avec volonté pour défendre zot *Imaan* et protège Rassoollullah (saws) et aussi joindre zot Maître Allah Ta'ala à travers zot martyre. Allah (swt) fine donne zot ene victoire décisive dans ene jour *Ramadhan* ki jamais pas pour oublier dans l'histoire de l'Islam.

En l'an 6 AH, Zaid ibn Harith (ra) ti être envoyé vers Wadi al-Qura à la tête ene détachement pour confronte Fatimah bint Rabiah, la femme la plus puissante de sa région là ki ti avant sa réussi attaque ene caravane diriger par Zaid (ra) et vole bane dibiens de bane musulmans. Li ti bien reconnu pour so l'hostilité envers l'Islam. Pendant ene bataille dans mois *Ramadhan*, bane musulmans ti touye li.

Vers la fin de *Ramadhan* 8 AH, traité Hudaibiyya ti cassé et l'armée musulman ti en conflit avec bane Byzantins dans le nord. Rassoollullah (saws) ti senti le besoin pour inflige ene coup fatal à la non-croyance dans l'Arabie et conquérir Makkah. Allah (swt) ti déclare So sanctuaire comme ene lieu de paix, sécurité et religieux. L'heure ti arriver pour purifier Ka'aba de nudité et d'abominations. Rassoollullah (saws) ti sorti avec ene l'armée kot ti ena ene nombre jamais vu auparavant. Zot la force ti pé grandi à mesure ki l'armée ti pé approche Makkah. Détermination bane croyants, guidé par la volonté d'Allah ti tellement grand ki Makkah ti conquérir sans bataille le 20 *Ramadhan*. Sa c'est ene date bien important dans l'histoire de l'Islam car après sa date là, l'Islam fine prend ene grand l'ampleur dans péninsule Arabe. Sa même mois et l'année là plusieurs bane statues de bane grands idoles couma Al-Lat, Manat et Suwa et bane les autres idoles ti détruire, kante même ti dans le mois de *Ramadhan*.

Nabi Kareem (saws), malgré sa bane zaffaires ki pas ti facile pour li, dans le mois de *Ramadhan* fine faire face avec beaucoup de bane épreuves et en même temps sa ti ene moment de purification, encourage le bien, décourage le mal et lutter pour la vie et bien-être de chacun. Dans ene moment bien difficile kot zot pé faire face avec sa bane epreuves là, mais malgré sa, zot pas fine baisse les bras. Zot fine garde zot *Roza* et faire zot *Ibaadat*, encourage le bien et décourage le mal et zot fine trouve le temps pour faire tous sa bane travail noble là, sans ki zot fine prive zot de bane les autres bons actions, *Alhamdulillah*.

Bane *Sahaba* dans l'époque Nabi Kareem (saws) ti bane croyants sincères ki pas ti peur menaces bane infidèles, zot ti gentilles et humbles envers bane croyants et zot *Roza* ti compléter pas seulement avec la faim et la soif, mais avec tous bane

actions honorable dans le mois de *Ramadhan* et après aussi, c'est avec bane tel sacrifices et lutter dans sa mois béni là, kot zot pas fine faire paresse nek dormi, prend *Ramadhan* couma ene fardeau lors zot, dormi pour touye les temps. Non! Zot pas fine faire sa, kot sa sacrifice dans le mois de *Ramadhan* ki zot fine faire (séki Allah fine dire faire dans le mois de *Ramadhan*) et aussi pour protège la religion parfait (l'islam) zot fine lutter, donne zot la vie pour la cause d'Allah et So *Deen*, et *Alhamdulillah* par bane tel sacrifices l'islam fine propager dans quatre coins lémonde et maintenant c'est nous ki bizin préserve sa vrai et grand l'enseignement de l'islam là. Faudé pas nous laisse nous continuer diviser aller même. Au contraire nous tous frères musulmans nous bizin uni kan nous tende sa bane sacrifices là et lutter pour préserve l'enseignement de l'islam.

Donc, nous oublier nous divergence. Moi comme le Khalifatullah de sa l'époque là mo pé dire zot nous uni, arrête la guerre entre nous-mêmes, nous préserve le *Tawheed* et *Sunnah* de nous bien-aimé prophète Hazrat Muhammad (saws). Li malheureux ki *mousalmaan* et *mousalmaan* pé la guerre, et sakaine traite so camarade couma non-musulman, juge so la foi et mette la loi pour barre li pou pratique l'islam couma fine ordonner par Allah. Tous sa bane massacres contre bane musulmans, de n'importe ki groupe dans l'islam li trouver, ki li Sunni, Shia ou Ahmadi etc. Eski ou ena sa patente pou décréter ki celui ki dire: **LAA ILAHA ILLALLAH MUHAMMADUR RASSOULLULLAH**, li pas ene musulman?

Alor comment ce fait-il ki ena pays musulman couma Pakistan - so nom *Paak* (pure) - mais bane ki à la tête pas pé agir couma bane vrai citoyens pure de sa la terre *Paak* là pour la tolérance de bane religions et la foi et *Aqidah* de bane dimounes. Hazrat Muhammad (saws) et l'enseignement fondamental de l'islam même interdit pour force ene dimoune pou accepter la religion de l'islam. Mais dans le cas de bane Ahmadi, li malheureux ki musulmans entre musulmans pé empêche so camarade pou pratique l'ISLAM même. Et voilà ki sous ene la loi de blasphème, zot arrête bane musulmans Ahmadi et tous bane ki soutenir la liberté d'expression dans sa filière de la religion là pou sois emprisonne zot ou sois tuer zot. Bien mauvais saki zot pé faire.

**Mo faire ene l'appel à zot:** Abandonne zot bane pratiques non-islamique ki zot pé faire au nom de l'islam et laisse Allah faire So propre jugement. Ou pas d'accord ki intel intel musulman ou sois non? Ki faire ou bizin sale ou la main et conscience? Laisse Allah faire So travail. C'est Li ki meilleur Juge. C'est Li ki conner ki sanlà ene vrai musulman ou pas. Li conner ki sanlà sincère envers Li et l'islam.

Li malheureux ki zot servi zot bane moyens mondaines pou arrête bane musulmans Ahmadi pou pratique l'islam. Oui, mo dire, l'ISLAM. Bane Ahmadi ena ene sel Bondié, c'est ALLAH, et nous prophète c'est bel et bien Hazrat Muhammad (saws), et nous livre sacré c'est bel et bien le Quran Shareef, et nous *Shahada*, c'est bel et bien: **LAA ILAHA ILLALLAHO MUHAMMADUR RASSOOLLULLAH**. Ki sanlà pou capave efface nous croyance de nous lékaire? Ki sanlà kan c'est Allah nous Protecteur. Allah conner ki sanlà So bane vrais banda, et So bane vrais banda zot eparpiller dans bane différents groupes de l'islam, et le jour fine vini kot Allah pé triyer So bane bons serviteurs pou faire zot ré-amène la gloire de l'islam.

L'histoire se répète, mais seulement mo pas parfait couma Nabi Kareem Hazrat Muhammad (saws) mais malgré sa Allah fine choisir moi pou essaye vine ene ti Muhammad, pou suivre so pas et vine digne d'être ene prophète-réformateur ki fine vini dans l'Oummah de Hazrat Muhammad (saws) pour la réforme de l'islam et de l'Humanité en entier. Zamais, Oh zamais mo pas pou capave arrive même à hauteur cheville de mo Aka Hazrat Muhammad (saws). Kan Allah dire, ki mo ene Adam, ene Dawood etc., pas sa veut dire ki mo statut fine vine pli grand ou meilleur ou ki mo pé créer ene l'autre religion, mais li veut seulement dire ki Allah fine reflecter en moi bane qualités, bane excellences de tous So bane prophètes - seulement pas à 100 % - pour ki mo capave être à la hauteur pour faire sa travail noble ki Li fine mettre lors mo z'épaule.

Li bien malheureux ki bane musulmans servi bane la lois pou empêche dimounes pratique l'islam et exprime zot bane l'opinions. Malgré le fait ki même **Nasir Ahmad Sultani** ti traite moi de menteur, et dire ki c'est li ki vrai. Voilà un peu plisse ki un ans ki l'autorité Pakistanais fine arrête li et depuis Mars 2017 pas ena aucaine de so nouvelle. Mo faire ene l'appel à l'autorité Pakistanais, large li. C'est pas zot ki bizin juge so case, mais c'est Allah. Li vrai, li pas vrai, c'est pas zot ki bizin puni li ou honore li. C'est Allah tousel ki pou deal avec li et tous bane ki bane menteurs, bane ki fine servi le nom d'Allah pou proclame zot kan Allah pas fine donne zot l'ordre.

Pas prend la justice dans zot la main kan zot pas conne fer la justice, kan zot pas capave juger avec ene l'esprit ouvert et en entendant le concerné. Saki Allah faire, sa même ki meilleur; alors ki faire zot presser pou exterminer bane dimounes à cause zot la foi? Eski zot fine gagne kit révélation de la part d'Allah pou touye bane musulmans couma zot même? Mo ré-dire, laisse Allah deal avec So bane

créatures. Li tousel conner celui ki vrai et celui ki fausse. La vérité pou bizin triompher, *Insha-Allah*.

**Wa makaru wa makarallah wallaahu khairul makereen.**

*Zot faire zot plan, et Allah faire So plan, et Allah Li le meilleur planificateur. (Al-Imran 3: 55).*

Fine arrive l'heure pou ki nous arrête juge la foi de nous bane frères et sœurs et ki nous guette nous propre la foi, et le mois de *Ramadhan* li ene mois idéale pou faire sa. Dans sa mois de *Ramadhan* là, nous retire tous nous la haine contre nous bane frères de même religion ki nous (l'islam). Nous tous ensam nous faire *duah* dans sa mois béni là ki Allah (swt) donne nous la force et la réussite pour jette base de sa Sahih Al Islam (Vrai l'islam, l'islam authentique) là afin ki l'ISLAM li unifié et vine solide.

Ki Allah (swt) faire nous vine parmi bane ki relève l'islam so grand valeur, avec so 700 commandements ki fine mentionner dans So Livre Sacré (le Quran) pendant *Ramadhan* et après aussi et ki Li pas faire nous vine parmi bane ki dire saki zot même pas faire.

Ô bane croyants, en ce mois béni là, nous envoye beaucoup *Darood* lors nous bien-aimé Nabi Kareem Hazrat Muhammad (saws), so bane compagnons, so bane descendants biologiques et spirituel tous les temps. *Insha-Allah, Ameen*.